

*De negentiende September 1572*

OM die rechte meeninghe ende het verstant te hebben des placaeets twelck de heere Prince van Orangien etc. voor weijnich daghen heeft laeten publiceeren, is van nooden, dat men weete, hoe sijn f. ghe. den 30 Augusti 1572 7 ofte 8 daghen nae dato des placaeets sich selves verclaert heeft naemlyck

1

Dat alle inghesetenen in Hollant ende voornaemlyck alle overheyden ende magistraten syner f. gh. den eedt sullen doen, ghelijck die onderdanen int furstendum Geldren ende Overijssel etc. ghedaen hebben, daerin dat vutdruckelyck staet dat sij die sweeren, sullen sweeren ende beloven die privilegien vrijheyden des Lants, met allen vermoghen voor te staen, hen der Tyrannie des hertoghs van Alba ende synes Anhanghs, oock der hispanische inquisitie redelyck ende dapper te weder setten, dat sij des heeren Prijncen ende des ghemeene vaderlants schaden sullen voorkomen ende daervoor waerschouwen sijnen f. ghe. ende des Lants nut ende profijt beforderen, gheen verbonden, noch verghelijkinghe die ghemeene welvaert aenroerende maken sullen sonder sijnder f. ghe. weeten ende willen te maecken ghelijck sijn f. ghe. sulcx oock nae te commen belooft ende gesworen heeft.

2

Dat totter oeffeninghe vander Evangelissche Religie niet sullen nieuwe tempelen ofte huysenen ghemaect sijn, oock dat die voorsz. religie niet sal in duisteren onghcleghen plaetsen, maer dat over al daertoe die prochie kercken ghereynighet ende ghegheven werden sullen, niet bij provisie maer bestendighlyck, want dat Godts woort billick die eerste plaetse hebben moet en mach in gheen twijfel noch disputacie ghebracht werden.

3

Dat die kerkendienaers ende schoolmeesters oock ander personen totter onderhoudinghe ende oeffeninghe des waerachtighen godes dienstes van nooden niet sullen onderhouden werden duer contributien ofte collecten gheslaghen op die borgherschap ende onderdanen, maer daertoe sullen ghenoomen werden, die renten ende incompten der kerken die tot der oeffeninghe der voorsz. religie toeghelaten werden over welcke goederen kerckmeijsters ende ontfanghers sullen ghestelt werden.

4

Dat die Roomsche Relligie daer sij cesseert ende afghestelt is ende sonder sorghe van oproer ofte verraderie niet can inghevoert wesen sal blijven cesseeren tot dat bij den staten vanden ghemeenen Landen anders daerin sal voorzien wesen.

5

Dat die voorsz. eedt van den mispriesteren ende allen die de oeffeninghe der Roomscher Relligie begheeren, sal gheyscht werden ende datmen vlietich acht hebbe of sij oock hem den eedt ghelijckformich houden ende draghen, daeruyt die overtreders als meijneedighe ende viandes des ghemeenen vaderlants ghestraff moghen werden, welcken dat voorsz. placacet niet en patrocineert.

6

Dat alle deliberatie ende beraetslaghinghen daer toe strecken sullen op dat die privilegien ende vrijheeden des vaderlants moghen bewaert ende onderhouden werden ende dat ghemeene vaderlant voort bevrijdet werde ende blijve voor die Albanische Tyrannie ende die hispanische inquisitie.

1) ARH, Handschriften, 3e afd. 822.